

003800

浩氣  
申端愍公詩集吟





003800

江南大学图书馆



11418865

吟 氣 浩



撰 紹 式 瞿

王雲五主編

叢書集成初編

浩氣吟及其他一種

中華民國二十六年三月初版

美耶

發行人

王雲五  
上海河南路

印刷所

商務印書館  
上海河南路

發行所

商務印書館  
上海及各埠



# 浩氣吟原序

嗚呼。九域飄迴。三精霧塞。寢廟之玉衣晨舉。昭陵之石馬宵馳。挾日月于南郊。畫乾坤于地戶。崎嶇庸蜀。實仗老臣。收拾管邕。豈惟一旅。夫何桂山雲擾。灘水波翻。四郊斷螳子之援。三都成魚爛之潰。謀人之軍師國邑。我則死之下。可見天地祖宗事已畢矣。于是慷慨誓死。暇豫賦詩。嚼張巡之齒牙。曼聲長咏。握魯公之拳爪。運筆橫飛。偉彼義人。慨然赴難。拘調同日。洵芝焚而蕙歎。合口唱酬。譬金春而玉應。遺言付囑。副墨流傳。壁漫窗塗。星緯芒角于字裏。墨陳紙故。雷風發作于行間。亦曰念哉。吁其悲矣。昔者睢陽苦賊。更樓起橫笛之吹。越石重圍。長嘯發扶風之咏。以至空坑被執。吟嘯之集頻煩。柴市歸全。正氣之歌激越。其人爲宇宙之真元氣。其詩則今古之大文章。吐詞而神鬼胥驚。搖筆而星河如覆。況復留連警蹕。沈痛封提。死不忘君。沒而猶視。人言天荒地老。斯恨何窮。我謂刼盡灰飛。是詩不沫。伊余晚晚。遘此痼瘥。燈火青熒。須眉如見。窗櫺寂歷。歎噫有聞。庸表汗青。長留血碧。嗚呼。八百三十紀之算。鴻朗莊嚴。一千一百字之章。鼎鍾銘勒。豈徒託諸詩史。終有攷于斯文。

# 浩氣吟

庚寅年十一月初五日聞警。諸將棄城而去。城亡與亡。余自誓一死。別山張司馬自江東來城。與余同死。被刑不屈。繫月幽囚。漫賦數章。以明厥志。別山從而和之。

藉艸爲茵枕。由眠更長寂寂夜如年。蘇卿絳節唯思漢。信國丹心止告天。九死如飴遑惜苦。三生有石只隨緣。殘鐙一室羣魔繞。寧識孤臣夢坦然。

## 其二

已擽薄命付危疆。生死關頭豈待商。二祖江山人盡擲。四年精血我偏傷。羞將顏面尋吾主。剩取忠魂落異鄉。不有江陵真鐵漢。腐儒誰爲剖心腸。

## 其三

正襟危坐待天光。兩鬢依然勁似霜。願作須臾階下鬼。何妨慷慨殿中狂。見定南於靖江殿憑加榜辱神無變。捉與衣冠語益莊。莫笑老夫輕一死。汗青留取姓名香。

## 其四

年年索賦養邊臣。曾見登陴有一人。上爵滿門皆紫綬。荒邨無處不青燐。僅存皮骨民堪畏。樂爾妻孥國

明 瞿式耜 稼軒



已貧。試問怡堂今在否。孤存留守自捐身。

其五

拘幽土室豈偷生。求死無門慮轉清。勸勉煩君多苦語。彭王二公時來相慰癡愚歎我太無情。高歌每羨騎箕句。灑  
泪偏來滴雨聲。四大久揅同泡影。英魂到底護皇明。

其六

嚴疆數載盡臣心。坐看神州已陸沉。天命豈因人事改。孫謀爭及祖功深。二陵風雨時來繞。歷聖衣冠何  
處尋。衰病餘生刀俎寄。還欣短髮尙蕭森。

其七

年逾六十復奚求。多難憑經渾不愁。劫運千年彈指到。綱常萬古一身留。欲堅道力憑魔力。何事俘囚學  
楚囚。了却人間生死業。黃冠莫擬故鄉遊。

兵部侍郎兼翰林院學士門生張同敞和

稜稜瘦骨不成眠。祖德君恩四十年。腰膝尙存堪作鬼。死生有數肯呼天。疊山欲附文山烈。蘇武休思  
漢武緣。蹈鑊撩衣談笑裏。何須血泪更潸然。

其二

連陰半月日無光。草簟終宵薄似霜。白刃臨頭唯一笑。青天在上任人狂。但留衰鬢酬周孔。不羨餘生

奉老莊有骨可拋名可斷。小樓夜夜汗青香。

其三

四載危疆一個臣。城亡待死愧今人。將軍不肯留犀甲。風雨唯聞嘯碧磷。九廟英靈應不改。三邊財賦爲誰貧。傷心宵旰當年志。寸磔應叢九死身。

其四

凜然大義自平生。囊底無錢魄亦清。二烈雙忠原有數。先曾祖居正諡文忠先祖敬修諡孝烈先叔祖克修諡忠烈九朝七世豈忘情。亡家骨肉皆冤鬼。多難師生共哭聲。想見刀頭空一切。長宵盼不到天明。

其五

日日刀錐攢我心。豈其天意有升沉。命延一刻慚難負。論到千年慮益深。此地骨原堪朽腐。他時魂不待招尋。昨宵猶夢亡親在。醒後唯留夜雨淋。

其六

忘生翻覺死難求。甲士相環任我愁。祭酒一身同臘盡。睢陽二子共名留。已揅魂作他鄉鬼。博得人稱亡國囚。三百年來恩怨血。先皇應許得從遊。

自警

不朽稱三立。惟名貫此中。完貞方是德。砥世卽爲功。生死休言命。春秋祇教忠。失身千古恨。大擔在微躬。



其二

平生美好境。此日復何求。天地一身外。江山不我留。悟因空後得。心向死邊休。領受須歡喜。參同在小樓。

其三

若論成人事。臨危止一端。聖賢原節取。世俗已驚看。死豈求名地。吾當立命觀。乾坤留此夕。魂魄也教安。

其四

佛教言生死。無過一了緣。朝聞纔是道。聖訓已居先。臨節徵完養。成仁誦昔賢。到頭方夢醒。在我不繇天。

憶聖蹕

鑾輿播越五經冬。風雨飄搖半避烽。萬藥總無千騎擁。三江應有百靈從。卜年未許更周歷。闢國寧教盡漢封。待死孤臣難赴闕。瞻天遙祝護蒼龍。

自歎呈別山

七尺那堪斗室蟠。禪關止靜好同觀。心維漢鼎千秋痛。目極堯封萬里酸。人語嘈嘈魂裏聽。飄風烈烈夢中寒。扶輿非大身非小。留得綱常宇宙寬。

聞同事諸公俱以招至感而有述

聞道諸公已受招。網羅施處幾曾饒。平生志節徵今日。顧盼衣冠戀本朝。達變恥爲文若伍。養高難許子方驕。俘臣苦憶無繇見。咫尺眞同萬里遙。



閏十一月初九爲先妻生忌。囚中人不能焚一紙。碩甫楊兄從鄉間禮懺詩以謝之。夢裏音容幾度看。似憐遭難慰予安。荒村誰伴三更雨。野櫬空圍萬疊巒。香火久湮塵土積。竹梅時聽珮聲珊。生辰累子猶存臆。特與冥資結淨壇。

夜夢在一室。如家中馭娑館。先少師命余設榻而臥。余卽拂拭書几。以臥具敷其上。几旁一罍瓶。觸而墜下。余以手承之。竟不墮地。完好無恙。覺而紀之。

遺像他人得。亡親入夢看。若悲嬰禍患。仍喜肅衣冠。效死忠臣分。成名肖子難。醒來還自解。高臥報平安。

閏十一月十七日臨難口吟

從容待死與城亡。千古忠臣自主張。三百年來恩澤久。頭絲猶帶滿天香。

其二

斷臂傷睛木塞唇。猶存雙膝舊乾坤。但將一死酬今古。剩有丹心傍主臣。

別山遺藁附

留守師贈詩賦答

仗節誰云有異同。此時此難正遭逢。書生恥效荀文若。夫子堪師信國公。共看挺身當亂裏。可憐渡水入城中。願隨君死非無意。烈烈天朝賴世忠。

夢傅司馬忠烈公

抗節如公有幾人。磔殘今尙夢全身。應知同學談忠孝。決不偷生負鬼神。視死如歸懷老友。有恩未報痛孤臣。恥將丹血分青史。與爾幽冥共結鄰。

自訣

一月悲歌待此時。成仁取義有天知。衣冠不改生前制。名姓空留死後詩。破碎山河休葬骨。顛連君父未舒眉。魂兮懶指歸鄉路。直往諸陵拜舊碑。



# 浩氣吟附錄

## 臨難遺表

罪臣瞿式耜謹奏。臣本書生。未知軍旅。自永歷元年。謬膺留守之寄。拮据四載。心盡力枯。無如將悍兵驕。勳鎮諸臣。惟以家室爲念。言守言戰。多屬虛文。逼餉逼糧。日無寧晷。臣望不能彈壓。才不能駕馭。請督師而不應。求允放而不從。馴至今秋。灼知事不可爲。呼籲益力。章凡數上。而朝廷漠然置之。近十月十三日。集衆會議。搜括懸賞。方謂卽不能戰。尙可以守。忽于十一月初五之辰。開國公趙印選。傳興安塘報一紙。知嚴關諸塘。盡已掃去。當卽飛催印選等星赴子營。而印選躊躇不前。臣竊訝之。詎意其精神全注老營。止辨移營一著。午後。臣遣人再偵之。則已盡室而行。并在城衛國公胡一青。寧遠伯王永祚。綏寧伯蒲纓。武陵侯楊國棟。寧武伯馬養麟。各家老營俱去。城中竟爲一空矣。臣撫膺頓足曰。朝廷以高爵餌此輩。百姓以膏血養此輩。今遂作如此散場乎。至酉刻。督臣張同敞從江東遙訊城中光景。知城中已虛無人。止留守一人尙在。遂泅水過江。直入臣寓。臣告之曰。城存與存。城亡與亡。自丁亥三月已。揀一死。吾今日得死所矣。子非留守。可以無死。盍去諸。同敞毅然正色曰。死則俱死耳。古人恥獨爲君子。君獨不容我同殉乎。卽于是夜。明燈正襟而坐。時臣之童僕散盡。止一老兵。尙在身旁。夜雨淙淙。遙見城外火光燭天。滿城中寂無聲響。坐至雞唱。有守門兵入告臣曰。清兵已圍守各門矣。天漸明。臣與同敞曰。吾二人死期近矣。

辰刻噪聲始至靖江府前。再一刻直至臣寓。臣與同儕危坐中堂。屹不爲動。忽數騎持弓腰刀。突至臣前。執臣與同儕而去。臣語之曰。臣等坐待一夕矣。毋庸執。遂與偕行。時大雨如注。臣與同儕從泥淖中蹣跚數時。始到靖江府之後門。時清定南王孔有德已坐王府矣。靖江父子亦以守國未曾出城。業已移置別室。不加害。惟見甲仗如雲。武士如林。少之引見定南。臣等以必死之身不拜。定南亦不強。臣與同儕立而語曰。城已陷矣。惟求速死。夫復何言。定南露色溫慰曰。吾在湖南。已知有留守在城中。吾至此卽知有兩公不怕死而不去。吾斷不殺忠臣。何必求死。甲申闖賊之變。大清國爲先帝復仇。且祭葬成禮。固人人所當感激者。今人事如此。天意可知。臣與同儕復語定南。我今日已辦一死。其不死于兵未至之前。正以死于一室。不若死于大庭耳。定南隨遣人安置一所。臣等不薙髮亦不強。只今清兵已克平樂。陽朔等處。取梧祇早晚間。臣涕下霑襟。仰天長號曰。吾君遂至此極乎。當年擁戴一片初心。惟以國統絕繼之關繫乎一線。不揣力綿。妄舉大事。四載以來。雖未豎有寸功。庶幾保全寸土。豈知天意難窺。人謀舛錯。歲復一歲。竟至于斯。卽寸磔臣身。何足以蔽負君誤國之罪。然纍纍諸勳。躬受國恩。敵未臨城。望風逃遁。大廈傾圮。固非一木所能支也。臣灑淚握筆。具述初五至十四日以内情形。仰瀆聖聽。心痛如割。血與淚俱。惟願皇上勿生短見。暫寬聖慮。保護宸躬。以全萬姓之生。以留一絲之緒。至于臣等罪戾。自知難逃青史。惟有堅求一死。以報皇上之隆恩。以盡臣子之職分。天地鬼神。實鑒臨之。明留守太保吏兵二部尙書中極殿大學士臨桂伯臣瞿式耜表上。





申端愍公詩集

本館新編叢書  
本特收時議各章  
書堂有出本

申佳胤著

本館據畿輔叢書  
本排印初編各叢  
書僅有此本



申端愍公詩集卷一

明 永年申佳允著

五言古詩

貝聖堂感賦

少讀封人編。惓焉懷遠託。今者至於斯。封人不可作。風物尙依稀。衣冠半零落。顧茲太古民。渾渾而噩噩。河北綠林秋。前年恣焚掠。登萊倒干戈。曹濮驚風鶴。余亦抱關者。夜深催擊柝。災害復相仍。彼蒼一何虐。安得封人起。呼天叩求莫。櫓槍兩地清。禾黍三秋穫。道路無聾聵。春風何寥廓。一簾案牘閒。萬戶弦歌約。天下惟有道。人心自木鐸。

黃梁祠

鉅鹿樹殷腥。黃河碧濤死。蛇豕偪荒林。魚龍積斷坳。縹緲叢臺月。春風照黿水。邯鄲孤堞懸。黃梁埜祠峙。馬影競夕陽。鳥聲沸嶺嶠。午移炊火新。秋合烟光紫。醉醒蕉鹿場。真幻鶯花市。天地劃然迴。榮枯率爾駛。短褐狎風塵。瓷枕認原委。稽首叩仙人。吾師注夢史。

王祁連先生書薦相士

有客楚中來。叩門投雙鯉。爲誰寄書郵。云是王夫子。夫子分邯鄲。四野歌樂只。風墨髻穉中。期予天下士。

發祥扁敝廬。母節揚閭里。感此覆載恩。而敢忘沒齒。鳬飛入長安。天涯真尺咫。今春解組歸。扼腕遭讒毀。夢魂楚山遠。捧讀胡不喜。大業勛千秋。低眉欲愧死。叮嚀寄書人。相士莫踰此。慚余骨氣酸。握手憐相視。貧更苦贈貽。無計充行李。東郭一相招。濁酒淡於水。尺素懸齋頭。如坐春風裏。

贈建德徐君顯

有客清源來。蕭寺傾談吐。翩翩文獻家。季叔徐工部。工部泣荊州。司李遷廣武。手不持一錢。兒卒詫清苦。布素屏綺羅。脫粟絕羞脯。志不在飽溫。面目存酸腐。性復好施予。不但無所取。入嗇出偏奢。蕭然一貧窶。典與佐饔飧。賣襦賑鰥姥。任滿陞冷曹。廠署清源潞。清源何繁華。工部視如土。亦如廣武時。閉眼卻阿堵。貌羸弱不勝。邨復見華臚。貪世獲茲人。是謂今而古。北斗仰高風。忽於猶子睹。了無膏粱容。落落一叔父。不敢款酒肴。况乎給資斧。猶子豈爲奇。孤高世德譜。飄然上平陽。傾蓋情如縷。贈以玉壺冰。工部應無怒。

清獄

下車泣囚心。千載生生意。顧茲縲紲場。慘烈魂爲悸。旱魃煽炎威。能無冤氣積。齋沐虔以清。滌掃周爲視。爰築好生房。庶廣犴狴嗣。入獄疫自除。生子吳爲字。善氣滿慳囊。慈航渡法地。虐吏何爲者。競以殺爲媚。

訓子

顧爾髫未垂。詩書急討論。人禽此其界。得失爲之根。勿驕貴而氣。勿縱放而言。清貧念爾祖。忠厚乃吾門。十寒則一暴。舍亡則操存。寧拙勿爲巧。過樸不厭渾。斯語置座右。奉爲金石尊。



憂旱

河北怒未已。旱魃驕益熾。山川何滌滌。千里幾赤地。仰瞻雲漢憂。能無監門淚。竭茲齋禱心。救罷屠酤肆。愆尤省厥躬。精白感天意。一雨霑霖生。再雨優渥遂。大有卜今年。小民戴靈賜。聲歡動千雷。憂隱中如刺。人曰旱之終。予謂澇伊始。旱澇巧循環。相因復相視。亢陽滿則除。陰霖芽且華。寄語河上翁。莫以泄沓戲。賑饑

羣盜蝟河北。長堤嚙陽侯。顧茲子遺黎。能無惕惕憂。捧檄煮粥糜。晨起驗斛區。偏儂積廠市。匍匐飽菑疇。寒風何淅淅。野杵亦叟叟。嘔心輸粒籽。屈指數麥秋。緩徵白骨起。減租菜色廖。耘茲一寸田。何必萬石甦。撫字甦郅隱。陋彼移粟謀。

南雍七子詩

天涯宦蹟左遷多。每誦斯言殊浩嘆。南雍豈其地耶。何遷人蝟集也。良友如雲。蔚焉劍合。亦一時之異也。作七子詩。

姚都諫思孝

淮南春翠藹。幽谷何窈窕。文章煥國華。風雅矜清妙。花磚拂瑞煙。梧掖紅庭燎。搖筆掃機槍。請劍撼蒼嶠。錯落風雷泣。震盪山鬼嘯。敵氣驕秋塵。神龍軼險突。環玦循無端。瑚連重清廟。南國有佳人。北極遙瞻眺。

李侍御謨